

五百四峯堂詩鈔

五百四峯堂詩鈔

卷十四

順德黎 簡簡民撰

甲辰年

三日張廉甫

澹泉

及諸兄弟小飲復志丈

室

昔時集爾梅花屋十六年來兩度看故宅故人俱
草莽

往年與同學數輩過張廉甫宅作梅花詩

生平菜幾盤餐鳬鷗

受命風波急鴻鴈謀饑羽翼單珍重酒邊兼去後

碧桃簷露警衣寒

正月五日省視李南淵丙申十二月留別
之作別後書至言正月五日度嶺

又是東坡度嶺期忽開南淵別筵詩故心桂管西
流水去路梅關北向枝涕淚羊曇哀死友老成庾
信失吾師小塘風雪同舟處地久雲多柳不絲

人日

年年人日倍懷人未有濃眠過此辰人事中年極
哀樂桃花行處着衣巾歸來歲晚無多日整頓風

情判十旬留客少
開門一角三分春色借村鄰

人日寄石帆

正逢人日憶斯人
絕世文章絕世貧
今日士窮堪畏懼
同時吾病稱交親
盧王前後隨牛馬
嵇阮琴尊漫笑嗔
自有死生真氣在
千秋風義足比鄰

春江吟

水西天落樹梢平
海國風煙坦掌生
遙知歸艇入邨口
祇見飛花聞櫓聲

雨釀濃青柳醉天
一彎愁黛暮山圓
船頭花影垂

垂簇親見饑魚嚼紫烟

寄雲隱

病得家居出爲貧見君翻憶往年春
向來哀樂增離夢何處風波無故人
龕火女持經課熟爐烟妻識藥方新
今年花事干誰事花裏三旬雨兩旬

小窓絕句

水漫寒陂草拭光春愁浩浩赴人強
小窓雷雨墻根竹着急蕉芽鬬筍長

寒雨獨坐

柳上高樓天渺茫岸低松杪走江光春陰自入黃
昏重雨氣遙垂黯澹涼鬢側藥烟妻久病人閒花
候我還鄉會須判斷今年興鶯燕關愁也不忙

水仙十二韻

萬物靜待始此花寒故來來遲遂成早無伴已先
回濶絕鯤鵬窟清寒水月栽神仙居混沌天地一
胚胎在昔瑤池宴疑遺溼露杯自從歸澤國何與
上春臺縹緲無真種徘徊憶賦才獻璫魚媵集邀
路海童開質弱幾迷霧波暄不圻雷嫁郎宜白石

塗額是黃梅叢薄難承夢窓光只費猜知君避名
去不作上林魁

寄王平水

燕

日者平水自五羊夜過村中

訪予或謬答以他出遂歸故有是寄

枉渚停帆踏軟沙凍雲沉火隔繁花繞林明月王
恭肇低草春風仲蔚家支楊藥烟燒柿櫨壓舟松
影夢蘼葭十年一誤山陰權歸路寒江幾倍賒

雨中雜述寄城西諸君十絕句

江北江南烟柳絲中間風浪盡情吹誰禁有怨無

言內可更雲昏雨益時

水村雜花萬樹多無有一點不隨波流花自繞江
亭脚已去仍回奈汝何

百里天陰切海平低雲含水重難行怪他夜雨翻
盆勢猶是春波拍岸聲

燕雛輕出濕毛衣凍立主人江上扉穿花撲絮無
人見仰接青蟲識母歸

狎鷗欺我太愁生
眈眈出波雙眼明
雲鴻似解歸
飛苦齊渡寒江顧影鳴

獨鳥窺魚持弱枝孤花和雨颭春漪溪光窈窕高樓影可要羅敷自得知

漠漠平林雨似毛春光人意總酩酊蘆灣半角黃茅屋一道炊烟十丈高

木棉花重打叢祠一隊神鴉正晝飢齊下空庭啄榕子屋山晴拔寄生枝

橫江漁女綠筠籃赤尾鯉魚紅汗衫鯉魚自好春

波惡靈雨飄風新婦潭

粵中婦人多着薯苓絳衣

急槳春江打綠莎往時擅煞越人歌十年花藥洲

邊客一覺鳳凰岡下波

戲嘲含笑

愁待花含笑翻成笑不成如何始開口知有幾多情

含笑答

不慳開露臉爲是答橫波未慣愁人對况兼風雨

晴復雨

近水人家瓦氣昏垂江低雨傍沙邨桺柳踈地啼

飢鳥蘆荻捎風觸怒豚柳絮紙灰沉熟食濕簑漸
驚動青原中年日月跳丸彈更與宜僚急手翻

晚晴漫題四絕句

竹外沙光渲晚日柳梢天色醒春愁東風不借楊
花力纔過東墻幾日留

紫霞西劃大橫庚濃抹西樵峰頂明倒射江雲下
東海水光廻合動江城

兩月春樓鎖夢雲往時悲笑浩難分傷心南浦今
朝綠故瑩清波送鴈羣

江上春深鴻鴈過人閒地久別離多綠楊樹杪連
天白盡日煙帆續逝波

題畫

兩道春洲隔水青桃花萬樹日冥冥紅衫碧草綠
波底上有浴鷗雙白翎

春天似墨水如鏡驚禽亂於空葉飄約畧山川一
千里拳攣低蓋過村橋

和張廉甫雨坐見贈且索近詩

病裏窮愁風雨時沉花滯絮況離思濫輸年命供

諸妄少諱飢寒悔作詩積學轉如容濩落謀生何
遽德支離惟君健在牢憂患少壯相看鬢欲絲

春寒懷雲隱

三月北風如早寒天清日凍似秋殘卽看魚婢迎
春水留得羊裘媼釣竿楊柳夢來官渡暗木棉吟
處雨雲淩嫣紅慘綠誰家樹不與樵夫上筆端

寄石帆

春城花絮撲天地石帆先生且須醉年年三月與
才人行坐傷心雜離思還鄉一別未十旬怪爾兩

年無數字往時客舍共形影不省飢寒到家事衾
枕同眠驚日久妻兒見面如客至猶憶前年大除
近重戀寒江小舟睡千波窖穴枯柳根孤燈播盞
漈花穗卽憂歸路入新年同作勞人負中歲人閒
陵谷猶朝暮爾我泥塗剩筋髓詩歌一世驅鬼神
名字千秋屬兄弟天教微命隨物化吾以萬象爲
兒戲石帆先生歌此詩且須復飲成然寐

閏月上已

昔時閏禊萬山樓破例春光益別愁兄妹十年生

死濶海天下里夢魂浮只今曲水添新淚似向桑
田訪故流且問佛前長病婦可能一再被除休

述哀一百韻

甲辰四月廿一日妻梁氏死矣向來護病繼
以傷心未嘗有詩至今七月六日感神仙夫
婦之說乃飲泣勉述此篇情至無文不知所
云而已

青龍在甲辰夏四月廿一買藥方入門飯熟不暇
喫大女泣屋隅小女啼繞膝老親堂上歎相對視

白髮下呼厨中婢掩面向曲突仰首觀皇天天陰
雨霏拂病婦呼就幃握手與郎別自從數月來心
緒無賸說目前卽長路安忍無一訣頻頻喚郎者
非是故瑣屑自顧無幾時中情甚飢渴君今撫我
體四肢已殭厥凜若置大水惟餘此心熱頃刻不
相語誠恐冰到舌天生薄命妾姓梁名曰雪固當
畏炎威值此長夏節生息雖滴薄安敢昧清潔憶
從嫁郎始恩愛膠投漆出入君懷中自憐可憐絕
微軀本多病蓀苓借年月自危情累人因以身許

佛拜賜禪病圖覽鏡入毫末中閨課齋期幽心事
經帙自謂留此身非敢取容悅幸依君子傍永得
奉巾櫛漸知金經理生死本一轍自無諸惡緣地
獄何罪孽轉識安樂死勝茲疴厄活但感君故情
千秋亦難割君昔萬里行三載影孤子及乎遠遊
歸風波未嘗歇妾爲雙輪轉君爲長繩掣牽縋十
八年今日合當輟翁姑老年人反見妾淹沒年衰
不勝哀哀時易成疾上堂娛色笑無以妾故奪他
人亦知孝行當入吾室兩女遺累君是郎之骨血

女笑妾則笑女瘦妾露骨妾死女有母女嫁妾則

畢妾有好男兒聰明第三姪可惜隔千里母子在

兩粵

婦請於家君以兄第三子彪爲己子方四歲在邕州

生人不識鬼音影

無可察及其長大時知此義難闕始與觀病圖使

彼思彷彿不然少時見習覩成故物此婢無容色

亦可十應七是妾手爪餘一日斷一匹買之五六

年漸得病體逸留之事新人或不致嫌嫉知郎爲

妾重憂牢固難掇不孝罪無後旋應擇良吉勉力

爲姻昏爲郎解沈鬱妾復有所請君恕無禮律若

在平昔時此事未易達可憐縱扶起膝強痛難屈
妾聞世人語君乃燕許筆有福死夫前此語俗不
忽况妾前世因幸與郎固結自思初作人未曾離
閨闈中間何言行自愧說不出又言婦人者無事
乃其質况有賢丈夫和聲滿琴瑟但於凡百人善
惡有名實婦人不自眩自眩義已失郎工書八分
文章自超迭後日此抔土煩君一方碣千年百年
後有人臨我穴椎碑驚我寢亦受人拜謁豹死留
其皮妾目亦已閉至云岐軒理固非藥餌缺眼看

郎玉體爲妾瘦兀兀盤渦沈巨舟有力不可拔妾
自魂魄弱莫葬山巖業山頭多故鬼新鬼畏迨軋
塋墳就近郊莫使水沁洩但須高數尺俾妾望門
閤松柏三兩株桐竹交相列碧草魂往來亦得蔭
修密魂寒就郎衣魂饑就郎啜縱無身口累亦不
相間濶今世且中逝他生焉可必倘化爲輕塵願
得上郎襪倘化爲罔雨就郎影邊滅願爲中山兔
與郎作柔札慎無犯教言復不畏剛折轟轟萬古
名妾亦倚擔揭今爲秀才婦雖未縻祿秩異時營

齋葬恩義到泉窟歸來定何年今日是何日記取
死別時風雨冥路滑哀哉復哀哉齒緊妄言訖爾
時尙握腕冰氣透我徹不知坐予處安計擘之脫
家人拉我去心死一寸鐵不知兩穉女呼娘叩頭
裂我欲竟此曲此曲不可闕我欲通乎命吾不若
是慙死生日以遠屈指七旬越傷哉半生內茲哀
幾時述

不眠

八月三日

不眠復何夢積望以成悲握手斯須內此生無此

期故人惟有老新鬼尙應知回首秋篁晚歸魂凍袖垂

秋風引寄二三故人

時寓佛山鎮

去年春風暖如玉白袷清波送越客

月坡

遠江隨柳

入天青天影還垂春酒綠今年直是半年雨春雨

晴時已秋色茫茫積水浮東南中有樵夫出門哭

夢繞新墳桐竹嫩月見古原霜露白松蘿莎髯鬼

大小鶻叫蟲啼人閒寂生前怯性常夢水未肯江

天試魂魄

亡婦生平自言常夢大水而畏

如今獨使野外居蒼茫

歸路何由識往時清陰笑談處上有出簷梧十尺
啼鳥爲君秋不睡天黑呼君到天赤君須但記從
此來好逐秋風入靈席靈前嬌女衣涼薄席上衰
燈火寒碧屋邊葉響疑我歸猶似當時深夜織秋
機不軋犬不吠魂去風中曉無跡我今客悶思今
昔別日淒涼最今夕一身死別生離內此夕情人
病人得故交零落况殘序寄子哀詩沾爾臆詩成
欠伸影在壁亭亭脉脉逼人直何須會面驚瘦極
已向空牆見衣窄

寄袁升父先是升父復至廣州書來促書
碑以漲阻今漲落升父已歸贛故有是
寄

今年巨漲東南赤茫茫西樵出寸碧昨來欲哭試
登高始見江湖展天白側身西望山塞眼知汝南
來淚在臆往從十郡勸農處五處城腰橫潦跡我
時僅避數尺地汝已能采徑丈石張三未返我不
來十回勝事九可惜峴潭水涸蛟鼉閉華岳石震
風雨蝕君家故鬼我新鬼兩事未成遺歎息

升父來請

以八分爲尊人書墓表予亦欲作亡婦碑俱未就自我出門動有礙使汝

還鄉黯無色要知我眼淚未乾亦恐能來書不得
秋天鼎鼎琉璃淨中年漠漠雲霧隔詩成今夕猶
自苦手豈前時可人役病馬應須復雄騁冥鴻豈
分長伏翼他時章貢導中原預向家山磨石壁

甲辰八月十五夜與潘秀才席上作

昨夜屋山風雨鳴穿窓裂紙作秋聲臥尋斷夢身
如醉穩愛今宵月不明海上忽開天萬頃尊前堅
坐露三更深慚學道難雌守膠芥坳堂過半生

孤月當頭萬瓦漈一辭不發百蟲喧銀雲玉露今
何夕凍蝶疎花秋故園瘦約青衿憐對影吟星元
鬢坐招魂君知破月無多睡夢洩真聲哭未吞

十六夜作別李孔昭

不喜秋聲畏月光秋天連夜費更張

十四夜大風
雨十五夜月

明今宵暗雨隨風細古屋青燈送影涼身入中年

辭美睡鄰無高樹寫哀商我琴君手殊憂樂借爾

中聲出玉房

時以琴借李
君李方新昏

廣州秋晚見柳感咏

水國西風裏秋光但水光去年今日路江口此垂
楊榮落看人急枝條畏汝長我生心已死離別太
尋常

示友

風揭滄江水撲城木棉城上接江鳴殘年賤子無
家別昨夢嬌雛哭母聲管輅故交嗤白幘徐陵夙
慧厭青睛鬢絲一夜三千丈自向吟邊寸寸生

石帆近遷居狀元橋予與袁曉巢十月十

五夜誤尋於紅橋同曉巢作

萬家夢中月月午寒城白出門不識路惟知向城
北松花鬼燈青樹社神火碧幽篁覆深井地冷無
人跡中有星散居元非仲翔宅不知窮廬人何處
坐歎息飄蓬及妻子傳舍互主客想當飢驅還門
巷猶未識風林小軒外落月對晚食

附作

袁法祖

轉蓬君無定曲巷我已遍窮廬臥何處使我不
得見竹屋熒青燈林月明白練可有素心人新
知慰貧賤疎星動樹杪寒風厲人面屈指數歡

會不及人事變此心自千古獨居亦云善

示袁曉集

去年今夕露沾巾官樹鄰園葉打人

去年居近官園

憂患

以來生有命饑寒爭與病勞身虛名城闕喧佻健
乞食文章辱鬼神喜爾論詩還判夜思家無夢已
經旬

咄咄兩賤士與石帆

咄咄兩賤士前世爲駟蛭子何於人閒故復逼煞
儂一見卽欲哭百慮莫解窮老槐孕心火崩山媿

靈鐘則知逐物化不隔以氣通自我慨然哭復蹕
莊生蹤出門屢回首墳側雙梧桐梧桐初種時病
葉憔悴紅臨當別之行慘綠甦未濃故人撫新物
新鬼愁弱叢別來警落木夢繞秋墳風四郊白漠
漠魂影何所容我哀爾甚憊爲婦謀蔓茸憶我十
年來減食儲藥籠今頗謝茲苦始見瘁汝躬身勞
室家樂晏笑溢華蓬此樂如隔世我生難再逢羨
爾劇自傷我實命不同咄咄兩賤士嘵嘵一羈雄

送別袁晳集歸東筦二首

清江始波白雲飛雲鴻照江行子歸語君昨夜還
家夢燈碧屋寒風動帷

我坐不歸非路長歸時無物遺靈床楚些無靈新
鬼怨招魂須致女兒香

趙渭川索觀予近詩一本遂攜至燕作詩

寄之

昔傳狂簡也能詩薜裼山肩或夢之夢裏漁樵自
南極吟邊心事兩天涯故鄉桐竹新魂魄今雨歌
謠古別離未合卿雲景星下來看白鳥鰕魚詞

周編

修書倉數夢見予而爲葯房言之葯房有句云或言夙昔夢見之山肩雙聳衣穿肘

寒感

海色湧空寒狂雲叠急湍脩魚陰喫日伏雨黑如
磐兒女爲人賤慈嚴夢我安憂慙身俯仰事業歲
催殘

城上烏

高城夜霜啼病烏病中南望聲嗚嗚背負月光影
墮地影邊彈丸遺滿途天寒日急何處穩身驚命
危不敢呼可憐是烏出謀食耶娘頭白不得哺故

巢昔寄十丈梧下有一雙無母雛自言當隨鳳凰
食梧桐無陰竹實枯北風卷地百草死蟲蟻奔竄
無處無不肯下來索一飽彼亦微命較我愚飢鷹
滿眼憐我苦特不食我我食渠皇天子物本一體
無復靈蠢巨細殊我當飢寒坐自得俯仰骨肉予
拮据搶天控地誰告訴肝腸一寸身區區引吭卷
舌皆我罪逝將歸飛手足瘡試立城頭望天海一
身蹭蹬雲糝糊邕邕南鴈雌雄俱過我語我傷我
孤前飛伯勞後鬼車嗚呼奈汝城上烏

代書示兩女

我道寄書回恐汝見書哭欲道不寄書汝祖蒿遠
目我女汝勿哭汝父哭已足自從出門來未得穩
一宿常思夢見汝每苦睡不熟又恐卽夢見淚在
夢裏續書此知我心吾身此煢獨

甲辰長至

年年長至人長病長至今年無病人兒女未知霜
露色里門初對竹梧新日痕可減泉臺夜魂氣潛
歸梅樹春往日藥錢惟買紙紙錢多勝藥砧貧

見佛桑花感詠

佛桑汝亦雪爲毬天末看渠及廣州似我歸根五
羊郡何人今夕萬山樓中閨禮石猶重蹀入戶曇
花尙拂頭舊恨新哀眼前淚佛桑應合此生愁

短歌行

歲華徂落心百憂北風吹日西海頭死人待欲夢
相語我自不睡魂魄阻魂兮倘自鄉里來應有淒
涼告嬌女他時緒夢爲耶說斷腸更勝吾夢汝嗚
呼三十八年年歲殘今年實欲無心肝

柳絲書館問謝蓋臣病

不見絃聲落暮塵
入簾黃葉病將軍
琵琶弟子秦風面也似今來殷仲文

五百四峯堂詩鈔

卷十四終

五百四峯堂詩鈔

卷十五

順德黎 簡簡民撰

乙巳年

人日歎

去年人日光滿室百枝燈迎藥師佛今年獨坐迎
佛處一點青榮照人日江雲黯慘村花晚江雨霏
微橋蘚滑出門凍立叫新魂魂氣疑從墳樹出一
時桐竹黑離合搖動呼吟森倏忽南風木葉水橫

波春溪水深沉綠莎往時千點桃花底春影亭亭
人渡河河邊人去花復多人生人日能幾何行吟
欲哭翻高歌曲無人憐歌則那黃泉白骨誰更惜
有情無情同一窠新墳兀兀古墳場滿地陰風吹
薜蘿

溪後歎桃花

東風如絲水光懶才有桃花覺波軟門前曲水作
團文花去仍回誰領管往時齋閣人扶病小苑西
窓春晚晚檐端落日不射人障眼霞光顏色暖淚

流似水看相續人去如花呼不轉攀枝歎息他家
樹花老無風去難綰昔日看花一寸魂水入滄江
暮雲遠

正月十七日題

還家漫兩旬半月睡醺醺死別來生夢春愁低怨
雲雨光林拭葉花重鳥并羣俯仰慚方寸空拋物
態欣

漫成示友人

出門無日無春酒獨往還成獨醒歸生世虛聞醉

中樂鶯花并覺眼前非持情忍淚猶防夢無病勞
親謾欲肥剩有憂思付垂釣青蘋風急屬蓑衣

示女

汝今身上衣是母之所練畱貯深篋中勿待衣破
爛恐汝眼下淚無復手中線縞帶在母貴紉繡倚
人賤父娶爲無後母續恐有閒他時鄰里人冷眼
窺我變我生自此始艱難坐恩怨母也織素機上
有巢梁燕昔時銜花飛識我嬌女面逐燕繞屋走
胡旋拾花片眼花抱娘膝驚哭牆壁轉去聲阿母一

破笑春風滿庭院
燕燕倘懷人
莫立鏡臺畔
不見鏡中人
鏡中人不見

晚照

雨後千家碧瓦煙
煙光渲日日絲寒
燕泥去地香逾重
鴉背晞風凍未乾
排闥柳花吹酒店
飛空山影壓漁竿
東皇解惜無多候
約束春陰劇不難

張璞中與在邕州一別廿餘年
鬚髮皆白矣
佛山鎮偶值談二三日而歸
惘然有作寄之

君歸二三月春水雲中繞紅棉夾青山中有白髯
飄一去三十年所得可償勞請君一回首天劃解
舸高白骨架黝石短魂汨長濤君昔故心人生死
那得料存或不得歸十九變土苗省君囊中詩蠻
語半已操中閒三十載別日與路遙時於夢中見
驚作死後交今嗟鬢鬚改幸極筋肉牢自君西去
深有弟瘞黃茅黃茅作瘴時滯骨痛腥臊彼土厭
新人今君歸故巢天末風雨黑禮魂須大招令弟死于
西隆凌雲陽春三月暮花鶯媚江郊物華且告退
之閒能詩

老境難獨逃攜手恐夢寐
回首頻自搔人行大道
閒日在高柳梢

柳蘼蕪桂桃榆桐蘭蕙相思成篇

楊柳樓心新燕飛蘼蕪山下故人非
生尋桂魄迷靈窟剩囑桃根得嫁衣
榆樹曉星窺獨宿桐花么鳳
忽朝饑盡芰蕙畝鋤蘭晚淚雨相思
種豆歸

寄潘振之十韻

西樵人賣藥
邕州數十年

邕管舊風俗可曾今昔殊耳風鳴鬼
彈眼火中猪都十字當途草

蓋人多妖術或結十字草於路
誤踐者輒得奇病因以挾利也單

輪軟足舉

俗多病酒疾足

竹枝魂影弱

人病以竹枝尋丈精神而招其魂

巫角病衾孤是事俱堪畏當年恐不虞想君千首

敏特地百神趨夢室還家夢壺公賣藥壺尊生齊

物我大道一賢愚社憶花洲在

家君昔結五花洲吟社于邕州多嶺

海詩叟述簡也與潘後輩相繼今聞寥落矣

人多鬼錄逋題封滿懷淚

情境遠荒蕪

舟中曉避雨

五郡垂雨脚大夫岡頂雲山飛舵一寸天插水三分挂席防龍挾低篷入鳥羣蘆灣蒙首睡萬象外

紛紛

友人二妓佐酒索贈二絕句

采得荷花挑兩筐
兩頭憐子在中央
一肩莫自有
偏惹看見重輕人在旁

桃花紅照李花白
病始勝嬌酒始醺
人閒祇有三
分月杜牧司勳屬二分

看雨

天低海竟入天黑
海逾光遠雨垂陰
靜春雲約態
狂罨城渲日凍過
柵帶花香米老沉
酣筆孤舟稱

水鄉棚頭廣
州花地

舟中與謝劍持

四月柳花飛滿城
高雲低雨各陰晴
柳絲書館吟聲舊
不改風蟬雨後聲
日射澄江徹底深
雲移晴嶂走空陰
須臾轉綠回黃裏
澹沱風恬浪軟心

乙巳四月念一日詩

在日情纏病他時鬼作去聲人
可能百花畔一悟再
來身藥鼎蒼苔古樵夫
白髮新厭生諸妄想粗了

一年春

乙巳五日舟中

青蘋風裏白沙頭盡日橫波來打舟梳髻大鬆風
太緊滑肩時接素馨毬

眼濶江心雨勢圓四天風挾軸雲奔人閒天海巉
巖極阻絕新魂況古魂

水吼青鼉浪作煙萬人迷眩失龍船飄風驟雨隨
龍尾才及還離尺五天

新藕皓如珠女腕小菱尖似越娘鞵太常清禁中

年弛稍蕩閑情未破齋

柳外天低暮倚樓星河中夜亂江流卽看燈火相
偎意個是郎舟個妾舟

水香波軟暗來風潮入西濠有落紅海珠日日花
爲市明日莫愁雲水空

不能寐二絕句

柳枝風急生夜潮曉月彎彎枝上搖江天風露凍
千里知有誰家魂夢勞

夏五天時三四更海雲山月照人明苦吟竟夜詩

何有有是秋墳桐竹聲

落照

天海夕陽多餘光送晚波
直流明挂練橫楫小飛
梭柳晚雲樓聳帆欹風
鳥頗幽憂散空闊浩蕩不
能歌

獨立

萬象逼獨立晚愁天海黃
遠陰千里靜濃碧一峰
涼物理從人入江流切意
長秋風近朝暮歸夢警
松篁

小女

汝哭能言夢娘愁到汝邊鬼知今隔歲爺尙不成
眠學紡車圓小勝簪髻重偏裁衣須倍得新減藥
煎錢

曉思

墻鳴迴柝聞柳合早禽分沙氣收殘月江光得片
雲經年曾幾睡此夜自初曛闊絕勞人眼天南大
海濱

歸村莊數日感家園荔支兩番不得喫有

作

去年別新墳出門荔支熟張槎

村名連佛山鎮

兩弓地天

水圍獨哭巨漲接大雨潦釀雲色濁顧恐未冷骨
卑地水入木不暇庇死魂堤溢海過屋崩流挾懸
霜前後百飛瀑土偶坐昏旦咫尺到骨肉安能作
梗泛或可命不速千憂破一歲九死投兩目今年
歸逾期已過六月六老蟬捐葉瘞饑鳥託枝禿差
得遠憂患不許及口腹豈敢爲口腹但感行跼蹐
憶我長齋人春晚病已篤供佛猶及新繁陰掇珠

綠

度曲

聽婁五唱芙蓉
亭淒然有詠

譜曲當時枉有神招魂今日却無因
翻憐十載邕州客呼得三生地下人
獨宿畏醒還畏夢中年傷別過傷春
自言自聽皆吾妄鬼錄何書許認真

乙巳立秋日寓懷咏雲

秋氣誰先與雲明河蕭索櫛泥銀已漂不語盈
盈水旋化凌波細細塵天女花枯零玉葉阿環晝
斷脰魚鱗可能待作孟蘭雨好乞如來灑病身

七月七日往端州赴袁升父之招

河漢自新秋天人異別愁兒啼無母夜親夢有方
遊山切雲端月帆吹樹底舟故人書昨至兩番慰
駸牛

紫洞村口夜泊寄婁五

他夕衡山月青天魂夢勞曲終聞此語

他夕十字
余傳奇曲

中海外屬吾曹秋水蛟龍開新風木葉豪無人自
多警燈火贅江臯

南海道中夜雨寄懷邱明府鐵薌並問趙

渭川歸予詩本

疾雨船頭掃船尾雨雲意僅丈尺耳却令竟夕江
上流盡作萬波趨一舟身心軒輊睡不得遠別新
知泥胸臆邱侯別我五月殘六月已度大庾關一
官去郡三千里幾夜新秋十八灘南風吹雨北過
黃雨急同時接深警水石秋來勢漸嚴江湖涼動
天俱永金臺聲價君騏驎澤國東南子舴艋也知
遠意繫夙昔何有相思到萍梗此去倘尋趙渭川
歸我詩卷爲我言七月七日風雨夜故人天末有

營魂

西南集

念載西征舊路長西南那得便殊方當時水遠山
平處得到西南卽故鄉

西南道中

連岡欲跨海到海忽斷截一里五石壁古跡曠新
血嵌寶綴蜂房俗傳竹篙穴不知波穿岬或誠石
嚼鐵鐵石兩不讓人命迭相閱層標塞西北雨氣
濃墨潑直似去路盡江合沙一切孤帆抱地轉對

漳劃天裂故人山城中相思甚饑渴我如江心石
浮沉苦捐撇浮沉石名十年不逾郡茲爲無家別回頭
水鄉晚白首望天末

泊背水汎

風驅嚙舄波百里去不休有如四山雨來赴我枕
頭又如聞怒帆破海駕巨艘舟人夜中起披簑聲
颼颼亦如塌病翼啖咽鷹薄韉前路甚鬼國天海
膠漆投在眼咫尺塞安知雲水愁我則如鰥魚百
慮耿兩眸童眠熟如蠶九死無一憂

舟夜

舟臥風水繁身意飽顛倒打槳赴江波何如掛帆
好青山喜畫師迎送媚我巧殊狀極陰晴無言豁
懷抱轉使眼力明爲得山氣早已似見故人閑心
足幽討

與升父論詩

造物者呈露各自有氣力文章之根源厥至窺命
脉廣以納諸有細以入一息神明絕欺妄語言瀟
精液狂簡謬小儒愚賤坐大惑袁生爾何感使我

露肝膈聲詩之於人有甚矣秋奕無使心有鵠勿
冀名生翼如將遊名山且爲言所歷士生古人後
寧有不踐迹始則傍門戶終自豎檠戟裨校轉渠
帥揮叱赴巨敵一身數生死百戰資學識絕境無
坦步高唱有裂筩彎弓石爲肉磨刀水先赤萬仞
虛我踵我射自正直人方跼而哭我已游八極究
其所歸理靜破萬物的要於其發端真氣貫虹霓
遇之在旦暮帛長不逃尺反身弗能誠可任背負
刺

題畫扇

昨夜江村黃葉飛
二樵居士出門歸
要與江山助秋色
赤藤滇杖舊紅衣

題畫贈彭明府

我已清齋過一年
空蒙心緒一緇烟
秋山淡到如秋水
不覺樵夫畫也禪

端州縣齋作

四天潑翠城郭濕
城頭窺人萬山立
城門朝開塞奔峭
勢欲與人爭出入
戕剝西極如綫來
至此擘

地風濤開羚羊咽吭不肯一吸盡哢逆倒壅屯雲
雷山巖水猛兩不下地弱往往蒙厥災居人不及
對面語脚下沙走長堤摧盲風顛浪昧道路非所
去處偏擠排入地塔影直於筆浮天城堵膠如栝
下視東流峽山口江水鬱作山崔嵬我昔尋常此
經過水落山高石頭大盤渦風雨神靈叫景福祠下有盤
渦聲如哀鴻俗曰猪子渦不常寒峽戰鬪鼉鼉餓
作作則風雨晦冥舟人畏言之帆檣疾轉指鳥飛性命欹危等鳶墮今來風水赫
餘怒猶恐乘桴到堅坐縣齋蓮幕多故人久別遭

逢情話親江光夜亂石頂月山氣忽生衣上雲樵
天海上花作屋出門白袷照青春當筵起舞醉沓
颺百縷雲氣千花塵酒闌袂冷夢江國萬疊翠屏
勞片魂

楊明府席上作

開徑看山直到門指看西嶺夕陽痕白雲紅樹簷
端晚庭竹簾花燭影昏舊客獨深今雨契一官纔
罷百骸尊衛公玉饌周郎酒醉恐肥羊破菜園

端州書院馬山長中翰

俊良

席上

萬竹迎風吟翠亭秋山涼入酒杯青善來文字昌
黎飲深破蓬蒿仲蔚庭衣警莎根移蟋蟀天陰荷
葉亂蜻蜓季長客帳無紅袖排闥中堂入受經

乙巳八月十五日月下

面上兩年草草根今夕霜汝魂隨冷月此淚在他
鄉身事無生樂江流有夢長我家惟閉戶桐葉自
秋光

峽山月示升父

十五年前峽山月客路思家纔幾日今年月來看

客幃低頭却無家可思江光箭急射石壁千嶂玲瓏動金碧蛟龍乍警迴深沉風雨卽來無咫尺秋陰壓地山多影夜氣浮天水搖白城郭逾時晦明改爾我盡情哀樂得離合之閒且如夢生死那能不沾臆回首家山今夕秋老親夢短夜長極梧桐葉響燈火細兒女夜啼鄰舍寂爲君語罷續太息起踏城埤半江黑過江塔影裊千丈軒然欲跨烏龍脊去弄初陽沃焦石

酬楊明府以詩謝作歸來小影兼示別意

戲押元韻

羚羊劈天開兩門中裊一線牂牁痕巖岨噫氣風
雨急城郭壓人雲木昏郡齋畫成照突兀不覺暗
壁聞哀猿楊侯好奇索我作一帋行署客我上客
尊城頭一招手萬岳排闥爭飛奔指點就行列罔
或抗不爲屏藩烟嵐滃滃上襟帶腸胃寸寸清囂
煩須與青天割雲根橐籥靈怪相吐吞湫潭深黑
倒金碧蛟螭潛伏如蟲昆空山窅奧吹萬喧萬動
有一靜者存冰霜年遠髮鬚白山水氣寒神色溫

人言招之卽欲出不出別有情所歎山中元芝許
斧子天涯秋草歸王孫童子清極念惻惻但負圖
卷無酒尊生平淫詩不勝酒悠忽自非劉伯倫山
高水長自茲別藻交荇橫行復言一囊雲壑兩石
硯楊侯貽此後人間多夢魂夢魂不畏天海闊來
我海中花裏村

升父相送便遊鼎湖時方九日一宿出山
而別

城中酒杯城外山山光飮酒青環環低頭黯淡飲

別酒酒中片雲行自還落日汀沙水波涌入城冠

蓋雲陰動峽風窈窕抽帆縮

峽風順逆無度操帆慎之

山影嵌

嵌壓船重但惜峰迴急背人安知雨散來旋踵下

院曉備登山輿兩竹尺板雙脚虛遠離夢想半生

足行且觀空叅鼎湖初行溪駛岬壁削五里七里

漸崖嶠冷風呼耳害地深裂石迎人力藤縛天地

去遠日月冥雲露來沁肌骨薄樓殿光炯松栢黑

幽鐘一聲千葉落龍湫百丈看不得以袖障面雨

漠漠僧言兩月山雨少聲勢十過六七約往時禱

龍致雨處石亭衝去柱折脚天龍廻合萬雷鬪良
鼇空洞四山弱客來夜驚潭水移臥恐山門無住
著老僧心寂如佛燈一粒明光定中閣語殘木樨
天散香俯睨萬葉霜有光始驚九日坐齋禁不見
茱萸浮酒觴凌晨出山顧山色忽覺別思來蒼茫
佳人好山兩難得并作一別那可當不如城關一
揮手牂牁箭急猶尋常今朝白水何作惡荻風吹
淚波湔裳遙知山中老和子齋罷攤飯局雲房出
山之水故人夢自此送人還故鄉

五言集卷三
六
佛山秋官里寄石帆雲隱

蕭條海日拓寒晴
饑鳥倉皇一葉輕
雲黑悞投陰野早
影孤深畏凍江明
高歌十日遺生死
落羽三年切弟兄
霧裏少微烟裏艇
勿言漁父有詩名

喬寓秋官里月下詠枯樹

敝裘蹭躑天崢嶸
仰面查牙枯樹撐
空拳白戰北風裏
凜有生氣驕無情
棲鳥夜驚打門聲
飛起影墮月地明
何時林呂好畫手
淨紙潑墨爲寫生
我方遲徊玩畫本
忽然貌我畫裡形
貫休寒巖古木

下着此面壁千年僧物近致遠誰解得解者吾與
之夜行客居始見葉滿庭春來未歸看汝榮亦可
同踏藻荇橫心遙歲短忽自驚故園梅樹綴雲英
兩年花底死生濶今夕夢中天水清

憶鼎湖示升父

鼎湖冠古端隋絕萬山裏泉迸地肺深樓競石角
起浩蕩樹若海上沸河漢水日行松風中雨洩石
雲底僧面香火色黝瘠頑鐵死禮梵洞響風燒紙
鐘呌鬼龍湫不能名欲狀氣已痿魂夢尙用壯時

復入心耳袁生善筆舌刻鑿造化理多聞前阿難
好奇後韓子樵夫鼎湖詩寄去三百里山城展詩
卷可得有歡喜不如城頭山落影壓吟几樹海升父遊鼎湖時語

追和胡孝廉

海

壬寅九日詩

并序

乙巳十一月十七日三更偶繙故帙得胡良
齋兄弟壬寅九日與予登高之作良齋落句
云幾得家山作重九癸卯春良齋歸爲蘭溪
廣文而以甲辰夏卒於官爲之識也

壬寅作重九晚登粵王臺海氣蒼然高拍天秋色
來天多地少寒潮大坦掌直入輕清外欲鞭島嶼
陸蓬壺盡剪波濤沼衣帶當時意氣屬天雲九萬
風前六七人可憐獨愛東南竹鬼嘯幽篁雨打墳
良齋有幽篁
琴嘯圖小影一官故鄉如作客海濶山高阻魂魄
病中半百兄眼枯天邊七十親頭白今夕哭君聲
自低新人挽髮墮未齊恐驚淚落不敢問祗道藥
砧懷故妻

客居行寄懷楊明府袁升父及諸君

今歲八月七星巖怪辭靈壁磨刀鑱歸來夢魂不
安帖動作險仄乘風嵐心長歲短百不睡一睡千
里馬脫銜鼉鳴寒峽風雨黑鶴唳古月江天藍故
人三五冰雪質赤城招手青嶠驂夢中雲路足一
蹶墮此異縣黃茅庵乖龍匿簷尺蠖屈羈鸞集楷
羣鴉喃智乖章甫走越市身竄北枳哀江南東方
漠漠海日凍照我塵黝青雲衫仙田賜炙紫玉死
夢室夜寒香草芟我今忽作負屋蝸拙思有如絳
繭蠶哀歌叩折碧玉簪昔時雲膩蔥摻摻故鬼何

知守故物不投井底投深潭心爲槁木無暖氣身
如飛蓬不可監故根異土何近遠舊淚新歡渾苦
甘楊柳楊柳黃氎氎搖落如此何以堪南山有豆
北山蕨八口再拜白木機

井

秋官里
客居井

綠莎垂石髻游虹裊文綆後園鵲查查日嫩桐枝
冷夢急絃聲繁愁到苦緒靜我家橫門水花落黏
春荇當年雙鯉魚親吸鶩鴻影

題鼎湖龍湫

清潭歛秋姿萬象碧轉靜連山赴東海氣若干虎
猛小挽西顧勢一石亦不肯飛泉裊天來白虹結
長綆曳之入深黑乃帖耳引頸至今千丈底猙獰
靡遺影乖龍眠查牙觸撥輒怒警一喚集風雨半
月羃雲景還如古甃縫蚯蚓縮莎井致祭吏自怯
疲縣民多青洪河向身捲白日搜瘡冷赫然若天
威咫尺臨爾頂知爾方寸內有疚不敢省於民嘆
暵久有願不敢請神靈憤其位激水使橫騁昔時
禱雨亭衝石如斷梗牲蔬忍慵懦出入得深迴號

令惟蒼蒼時若聽天秉

檢亡友黃仲則手書

古之傷心人黃生爾爲近落魄西入秦秦聲轉幽
憤孤忠破豪髮萬象納壑粉靡志託酒色不語示
細謹八座友布衣知己奏情軫佐軍幕府下高坐
轉不穩蒼樹繫翠絲青天晚秋隼萬里跼寸畦意
氣奄欲盡長歌出塞曲落筆涉憂憫河聲百篇放
霜色一字緊寄我入關書狂簡謬稱引夫子隔天
末氣通共肝腎

來書有云可見
心氣之通也

與君大塊內迷路

失簷尹子往獨客死我縮一蠶春文章爲鬼雄六
氣結遊紉南望倘見我乞食受嘲哂蒿目叫西魂
吾詩廢招隱

林以善畫鷹

絹素古慘澹黑若雨竟天夢夢雲斷嵯浩浩風揭
川蒼鷹眼如鬼光墮衣帶閒遠見兩肩下竦挾秋
氣寒影失凍波底意已孤雲前一晌謂其去再晌
驚其還三晌往復亂萬里自倒顛測彼畫師心靜
入面壁禪而使後來人心目不得閑

袁曉巢孝廉輓歌

死別中年多何意哭至汝病病生友在心長不能

語紙書黎二樵眼語葉錫珉

錫珉曉巢鄉人來尋予述曉巢臨終於子

切切之意時已不能言矣問之猶能點首云

今夕北風寒樵夫不出門

樵夫夢中事是我死後魂豈知汝魂弱不得入我

夢我病夜不眠魂來亦何用知爾垂死意學詩門

戶成目前一寸路身後千秋名人閒此何時口碣

心冥冥此事需此人不能一呼兄不苦受命短但

苦受病速亦不恨病速恨我道路隔我必傳汝詩

使汝死瞑目來世爲詩人汝亦得自讀再來樵夫
老可作忘年契試吟樵夫詩恍惚尙可記可記不
必記天長人事異汝之心中血是我筆下淚區區
文字業苦習道則壞長短不足較造化同一氣生
死久暫閒如數一至二去矣袁曉巢一往岷轉背

五百四峯堂詩鈔

卷十五終